

七經同卷



清刻龍藏佛說法變相圖

七經同卷

敬告

佛說出家緣經

佛說阿含正行經

佛說十八泥犁經

佛說法受塵經

佛說進學經

敬告

佛說得道梯隆錫杖經

持錫杖
法附

佛說貧窮老公經

佛說出家緣經

後漢安息國三藏 安世高 譯

如是我聞一時婆伽婆在王舍城耆闍崛山
與大比丘僧俱千二百五十是時難提優婆
塞與五百優婆塞出王舍城上耆闍崛山往

詣佛所頭面禮足長跪叉手問佛大德願聞
優婆塞五戒毀犯正戒有何惡事佛答難提
優婆塞楚害生命有十惡事何等十現世常
懷害心後世毒心隆赫恒被痛苦怨怨不息
人不喜見思慮多惡見者怖懼眠不安寐夢
則惶怖覺則驚悸死時狂勃種短命栽身壞
命終生地獄中設得爲人多病少命是爲十
惡事偷劫他財有十惡事何等十貪饕深重
恒爲衆疑能興重惡行則非時動則非法親
友惡逆賢良疎遠敗戒果敢常懼王伺須財
市命種遺寶物貧弊之業身壞命終生地獄
中設得爲人飢寒困苦致財良難雖獲少財
五事共之王賊水火及惡妻子今乃藏埋會
亦當失是爲十惡事邪姪有十惡事何等十
常爲其夫伺捕楚毒室家不和善法消竭不

善法增危敗軀身不檢其妻不守財賄常爲
人疑宗親不信種業如是門不貞潔身壞命
終生地獄中設得爲女非獨一主設得爲男
馳騁邪姪自失其妻是十惡事妄語中有十
惡事何等十口常臭爛善神背叛凶鬼易陵
實言流世衆所不信俗爲重事不在言議未
有實事惡名遠聞爲人輕毀不起恭肅雖言
有實人不奉用多懷愁怖種誹謗業身死命
終生地獄中設得爲人常被誹謗是十惡事
飲酒有三十五惡何等三十五散盡財賄致
衆苦患怨諍增重裸露形軀惡名遐邇慧明
日減應得不得已得便失顯揚惡事要務頓
發憂感之本恍惚變沒顏貌鄙惡輕慢尊長
不知供養沙門婆羅門自於室家不辯尊卑
不宗敬佛不崇大法不敬事僧返親惡人遠

離明能崩墜邪道無慙愧心不護根門惛荒
婬欲衆所不愛人不喜見德士宿舊咸來咎
責集造衆惡要用之勢不豫識任智德隱避
像類不別去泥洹遠種狂惑業身死命終生
地獄中設得爲人愚癡頑瞶是時難提優婆
塞及五百清信士諸天世人四輩之衆聞佛
所說畢命受持頭面遶竟踊悅而去

佛說出家緣經